

# FOLLETO MISA CON NENOS

28 de abril de 2024


**Domingo 5º de Pascua-B**

Evanxeo de Xoán 3, 18-24:

*“O que permanece en min e eu nel  
dá froito abundante”.*



## Unido á VIDE para ter VIDA



## 1. MONICIÓN DE ENTRADA

Irmáns e irmás:

Neste domingo 5º de Pascua Xesús dinos que El é a vide verdadeira e que nós somos os bacelos ou ramas que recibimos del o zume para dar froito. E por iso estamos aquí: porque queremos recargar a nosa VIDA de graza, de fe e de amor ao orar, ao escoitar a súa Palabra e ao comungar o seu Corpo na Eucaristía. Amigos, vivamos conectados a Xesús, vivamos sempre preto del e así daremos bo froito e froito abundante.

*(Traemos uns acios de uvas e unha frase: “Unido á VIDE para ter Vida”).*

**Sacerdote:** No nome... - **Xesús que nos convida a vivir unido a el para ter vida, está convosco.**

## 2. SÚPLICAS DE PERDÓN ou ASPERSIÓN

**Sacerdote:** *Deus é amor, coñece as nosas debilidades, pedímoslle perdón.*

\* **Neno/a:** Porque conectamos pouco con Deus para enchernos da súa vida. *Señor, ten piedade de nós.*

\* **Catequista:** Porque a nosa vida está marcada pola rutina, polo ir tirando. *Cristo, ten piedade de nós.*

\* **Pais:** Porque nos falta creatividade, paixón, amizade e unión con Xesús. *Señor, ten piedade de nós.*

*(Pódese realizar a aspersion no canto do Señor, ten piedade):*



**ASPERSIÓN:** Neste tempo de Pascua, coa aspersion da auga, lembramos aquel momento no que nos unimos definitivamente a Xesús resucitado, o momento do noso bautismo. E renovamos así o noso compromiso de andar nunha vida nova. (Aspersion)

– *Que Deus todopoderoso nos purifique do pecado e, pola celebración desta eucaristía, fáganos dignos de participar do banquete do seu reino. Amén.*



### 3. MONICIÓN ÁS LECTURAS

-Paulo, perseguidor dos cristiáns, tivo unha importante experiencia camiño de Damasco: o seu encontro con Cristo resucitado. Este acontecemento cambiará radicalmente a súa vida e de perseguidor de Xesús convértese nun gran apóstolo. - San Xoán, na segunda lectura, dinos que viviremos na verdade cristiá se cumprimos o mandamento novo: “Amádevos uns a outros como eu vos ameí”. -O evanxeo lémbra-nos que para dar froito abundante temos que vivir unidos a Xesús, como a vide aos baceiros.

## LECTURAS

**FEITOS 9, 26-31:** *E contoulle como vira o Señor no camiño.*

Naqueles días, cando chegou Saulo a Xerusalén, procuraba xuntarse cos discípulos, pero todos lle tiñan medo por non creren que fose discípulo de verdade. Pero Bernabé colleuno consigo e levouno onda os apóstolos. Saulo contoulles que vira o Señor no camiño, que lle falara e que en Damasco predicara publicamente no nome de Xesús. Conviviu con eles en Xerusalén, predicando con ousadía no nome do Señor. Falaba e discutía tamén cos helenistas, pero estes querían matar. Ao sabelo, os irmáns levárono para Cesarea e fixérono seguir a Tarso.

Daquela, a Igrexa tiña paz en toda a Xudea, Galilea e mais Samaría. Crecía coma un edificio, progresaba na fidelidade ao Señor e coa asistencia do Espírito Santo ía aumentando en número. Palabra do Señor.

**SALMO 11:** *O Señor é a miña loanza na grande asemblea.*

**I XOÁN 3,18-24:** *Este é o seu mandamento: que creamos e que amemos.*

**XOÁN 15,1-8:** *O que permanece en min e eu nel, ese dá froito abundante.*

**Narrador:** Naquel tempo, díxolles Xesús aos seus discípulos:

**Xesús:-** *Eu son a verdadeira vide, e meu Pai é o labrador. O bacelo que en min non leva froito arríncao; e o que leva froito límpao, para que leve aínda máis froito. Vós xa estades limpos, pola palabra que vos teño falado.*

**Permanecede en min e eu en vós.** *Así como o ramo non pode levar froito pola súa conta se non permanece na vide, tampouco vós se non permanecedes en min.*

**Eu son a vide, vós os baceiros.** *Quen permanece en min e eu nel ese leva froito abondoso, pois fóra de min non podedes facer nada. Se alguén non permanece en min, é coma os ramos arrincados fóra, que secan; apáñanos, bótanos no lume e arden.*

*Se permanecedes en min e as miñas palabras permanecen en vós, pedide o que queirades e hásevos facer.*

*Nisto é glorificado meu Pai, en que levedes froito abondoso e vos mostredes coma discípulos meus.*

**Palabra do Señor.**

**(Narrador – Xesús)**

#### 4. ORACIÓN DOS FIEIS

**Sacerdote:** *Necesitamos de Deus, como os bacelos da vide; pidamos ao Pai que atenda as necesidades que agora lle presentamos, dicindo:*

**-Que vivamos unidos a ti, Señor.**

1. Pola Igrexa, repartida por todo o mundo, para que permaneza sempre unida a Xesús. *Oremos.*
2. Pola nosa parroquia de N., para que todo o que faga e celebre sexa para estar máis preto de Xesús. *Oremos.*
3. Polas nosas familias, para que sexamos parte da gran comunidade que é a Igrexa e podamos rezar xuntos. *Oremos.*
4. Polos que nestes días reciben o bautismo, a confirmación ou a primeira comunión. *Oremos.*
5. Polos que seguimos a Xesús, para que coidemos a amizade con El na oración e na eucaristía. *Oremos.*
6. Por todos nós, para que nos convenzamos de que a unión con Xesús é garantía dunha vida con sentido, unha vida frutífera e feliz. *Oremos.*

**Sacerdote:** *Axúdanos a vivir unidos a ti, Señor, e así o noso amor non será de palabra senón de xestos e de verdade. Por Xesucristo...*

## 5. OFRENDAS

### - UN MÓBIL CON CARGADOR:

Xesús, queremos vivir conectados a ti. Só así teremos luz, enerxía, forza. Só así viviremos a alegría de ser dos teus e de ser as túas testemuñas no noso colexio, na familia, nas diversións ou no traballo.

### - EVANXEOS:

Hoxe para vivir en contacto cos outros temos os móbiles. Pero se queremos conectarnos a ti basta abrir uns evanxeos a través dos que ti nos falas, meditar no silencio do corazón ou participar con toda atención na eucaristía. Eles dannos a cobertura para recibir o teu amor e as túas mensaxes.

### - PAN E VIÑO:

Tamén che ofrecemos este pan e este viño, son o mellor froito que ti, Señor, nos deixaches. Con eles, ti segues vivindo en nós.

## EU SON A VIDE

Unha tarde de amores acendida:  
eu son a vide, vós os baceiros,  
coa miña vida teredes o crecemento  
para que deades o froito sen medida.

Abertos ao amor, cheos de vida,  
recibide do meu Espírito o alento,  
será do noso líquido o fermento,  
e poderedes ser vós a bebida.

Pero habedes de pasar por dura poda,  
o acio prensado longamente,  
madurado en bodegas silenciosas,  
será consumación da nosa obra



## 6.- ORACIÓN DE GRAZAS

### *Que non nos separemos de ti*

Xesús, hoxe disnos no evanxeo que "*vivamos unidos a ti, como o bacelo á vide*".

Sen ti, Xesús, non podemos facer nada, porque ti es a nosa enerxía e a nosa brisa, o noso sangue e o noso zume.

Ti es a auga viva, a fonte cristalina, o lume vivo e transformante, ti es o pan vivo, a eira de trigo ondulante, viño anello que namora, es alento e vida que respiramos.

Sen ti asfixiámonos e morremos; sen ti as nosas palabras son baleiras e os nosos sentimentos coitados; as nosas relacións hostís, os nosos amores posesivos e as nosas festas máscaras.

Ti, Xesús, es o toque do Espírito, o canto, a inspiración, a medicina, o perfume, a plenitude e a transcendencia.

Xesús, que nunca nos separemos de ti, así daremos froitos abundantes de fe e de amor.

**FELIZ DOMINGO  
DÍA DO SEÑOR, ALELUIA**